

Buna sira, buna sira me cari siuri! E ben c'me c'la va?

Si sei chi el vo' dì ch'jei pagà el bjët e anlura cuc sold i l'ei ancora vansà, dop tüt el tasi novi ch'jon bütà an ver a la fen d'l'ani.

Ah certo che u Stat a l'ha na gron fantasia a anventè del tasi uriginal, giüsti, chi fon meja d'intort e antont chi ch'el paga i son semper i medesim! E an combi ad che roba? Me a j'ho ancora vist niente!

J'havi cuc sold an bonca? El Guvern a l'è andacc a pievni an po'. A j'ev in casinot? Anlura paghè l'I.S.I. e po' l'I.C.I. A trev veja an po' d'armenta? Anlura o poca o tonta c'la seja umbsogna paghè in mugg ad sold e i casunèt a suta cà i son semper bej e pen! Oh! Sa stuma nent atent im fon paghè anche l'aria ca respiruma! E c'l'è fùna grama e inquinaia!

Meno male che Gorla l'ha nent savì ca j'ava in mareng lè, an su ripion del camen, se no u rivava an sà con cula barbata e l'ogg svigg e um na purtava veja mes! Putost um al sciapava an metà! Vist c'l'ha nent pudì, anlura l'ha anventà la tasa an s'el posteggio del machini an s'la strà ad nocc! Dem da ment a me, purtevla an cà, la machina, a la sira, c'me ca favu na vota col biciclèti!

Avei pasiensa s'am son sübit sfugà con el tasi, ma ist'ani l'è stacc n'afari teribil, neh! Acsé almenu, c'me cus dis, rancà u denc, rancà u dulur! Mah! U saral po veira?

Se, perchè ist'ani u j'è capità toncc ad cui afari che, sa uardeisa, anveci ad fè la rapresentation, a pudreiva fè na businà c'la düra tut la sira neh! E d'afari bej l'è nent cui na seja capità toncc. Me um na ven an ment jën sul: l'elezion ad Scalfaro a President ad la Repüblica. In brav omi neh! Jën ch'el ven da l'Asion Catolica. Mudest ma anteligent e decis, quondi ca l'è ura. A l'è stacc anche chi, an s'ist palc c'me me ades! No, nent ades, ma diversi ani fa a fè del cunferensi. C'me ch'el parlava ben! Ater che cui babaciu chi son semper lè pront a di del strambaleiri an television. L'è veira che d'an po' ad temp u j'è u "telecomamdo" e anlura at pori cambiè canal e magari smursela anche, la television, senza bugiet d'an su sufà.

Eh, la gent a l'è amnija ben pigra, neh! Ades us fa tüt con u telecomando: ad drobi el garage, at drobi et sari la machina, t'anvischi la luce, la radio, el grammofo, la cüseina, la segreteria telefonica: se, cul arneis ataca u telefono che quondi cu j'è ansën an cà ut parla u sta a senti se chi

disu e ut fà tucc cui “pit-pit” an t’el j’urigi che te t’armani lé, an po’ ambalsmà. A l’è tut per favuri la comunicasion! Perchè ades la gent as parla pu! La sgnaca an mache di buton e quondi che si catanai is guastu i son di dular! Perchè j’hon nent ancora anventà in buton che, sgnacondli, u ronga i buton ch’is son rut!

Ah! sui fissa in buton per fè spari cui ca dig me! Che po sa television, se t’stai nent atent, a s’anfila an cà toua e at peja el fià.

U c’ mensa la giurnà, e l’è sa *Uno Mattina*. Si vori crumpè cuc cosa *OK Il prezzo è giusto!* Si porì nent sorti, u j’è *Servizio a domicilio* e *A casa nostra*. Se per caso i vori fè el bagn u j’è *-Acqua calda*. Si sej an difficoltà i porì vighi *Italia, istruzioni per l’uso* o se no i porì semper di: *Mi manda Lubrano!* Se po j’ei di *Affari di famiglia*, stè atent perchè lur i fon anche *I fatti vostri!* S’jeisi in fiò o na fija da mariè, preoccupèv nent perchè u j’è *Agenzia matrimoniale* e po *Scene da un matrimonio*. Po a la sira, *La cena è servita* e dop in bon *Caffè italiano*. Stè atent a righè dricc perchè se no iv broncu cui du *Telefono Giallo*, i fon *l’Istruttoria* e j’andej a finì *Un giorno in Pretura!* Con *Forum* i rongi el question con j’ausen o se no j’andej a cuntejla a *Maurizio Costanzo*. E a la fen d’la giurnà i fon spiritus e iv don anche j’*Avanzi!*

Basta!!! Us na po pù! An d’o c’l’è u telecomando? A l’è mej che j’affari nostri as ja fasu noi!

Sta prùma j’on facc j’elasion e dop a tont temp j’on facc el Guvern con cuche facia nova. Is son finalment antajà che l’Italia la stava per andè a bagn e anlura j’on stabili c’umbsogna tirè la cinghia. Nujater!!! E lur??

I partì i son nent ancur partì ma i son tücc an crisi. Us capis che an tücc isti ani j’on facc degli ancrustasion cu j’è gnonc pu....el Calfort cui salva! A la fen ü j’è sciupà el bugnon e tüt el mars el ven fora. Speruma che sti giudici il gnacu ben ben isti bugnon perchè au d’ an co tra pizzi, tangenti e ater u j’è da dübitè cui seja ancora cuc cosa ad pulid.

A j’ho dicc che i partì i son an crisi e tücc, ant’ina manera o ant’inatra i sercu ad rinuves.

Per el Partì Sucialista la sarà an po’ pù düra perchè a l’è el partì c’l’ha la tradision pù antica. Se, perchè dis cu j’era sa ai temp d’le Mille e una notte, ai temp d’Alì Babà e l’hava sa quaranta iscricc!!

Chi a Lisondria anduma mej, se! A fuma meja ad fadeja a truvè u Sencic. Figurev che ant’in ani sul a n’uma truvà trei: Mirabel, cul c’l’era el fiò ad so pari ai temp d’j’elasion, Priano che tra in parcheggio e in cùgna l’ha duvì andè a cà e ades Veronesi, j’en c’l’ha stüdià e c’umbsogna cu stüdià ancora pù tont per rangè i chënt del Cumën! E ansema ai chënt a

l'è mej cu diga ai so asesur e funsiunari ad fe rangè el strà perchè el rovi del noster biciclèti e... cuc cosa d'ater a forsa ad spiciè i son amnì beie quadrà.

E ch'ij rongiu ben, nent c'me cu j'è capità an Piasèta d'la Lega. I cübèt ad preja cu j'era na vota i son durà sent ani, cui nov gnonca doi ani e j'on sa duvì fè degli arciapadüri.

L'edicula finalment i l'on spustaia da an fond el Curs e i l'on facia bele nova. Cuc disgrasià a l'ha sa trovà la manera ad danegiela.

Dis che el Cumën, per fè su an po' 'd sold, l'abia aumentà el presi di loculi au simiteri. In me amis u s'è anfurmà e po l'ha dicc: "Eh, c'me chi son car! I fon fùna scapè la voja ad muri!"

Tucc j'ani po a parluma ad certi palasi, 'd la Galeria Guerci, d'l'illumination del strà e del scoli chi son ant'in stat da fè pietà. Ma per el scoli u smeja che ades j'abju trovà na solusion.

Se, perchè el Pruveditur ogni ani u na fà sarè jëina e acsè la question as risolv da bele sula! Ad ogni modo, dop a 68 ani a suma ancora chi ant u salon di sti bravi Frà per rapresentè la Divota Cumedia e el po capitè tut cul ch'el vo ant'el mond e chi da noi che noi a saruma semper ferm e decis a pruclamè la speronsa e l'amur du Signur per noi e per tut la gent del mond. No! L'è nent con el gueri e con el rubereji c'us rongia el question!

A l'è con l'amur e la sulidarietà, a l'è donda ogni dën ad noi cul poc o tont ca puduma au servisi d' jater c'us pudrà dabon cambiè an po' el mond an mej!

Na guta d'amur c'la scava la preja 'd l'egoismo, 'd la cativeria e 'd la disonestà. Ma c'me cl'è c'mensà tüt su chì? Ades a prov a cüntevli: donca, quasi doimila ani fa, ai temp d'l'imperatur Utavion

No, l'è mej c'am fasa aiutè da la me famija, se no a fas in monologo, voi i va stufi e me... a son nent Gassmann.

Anlura ades av la present...